

Visoki predstavnik ukinuo zabranu učešća u političkom životu BiH dvojici dužnosnika

Visoki predstavnik Paddy Ashdown danas je donio Odluku kojom ukida zabranu učešća u političkom životu BiH dvojici dužnosnika.

Zabrana je ukinuta u slučaju Nikole Grabovca kojeg je visoki predstavnik smijenio 14. juna 2002. godine sa pozicije ministra finansija Federacije BiH jer je bio pod istragom Kantonalnog tužilaštva Sarajevo. Zaključeno je da više ne postoje razlozi za smjenu gospodina Grabovca. Gospodin Grabovac ne predstavlja prijetnju za provedbu mira ili za integritet institucija BiH. Sada ne postoje nikakve zakonske prepreke koje bi spriječile gospodina Grabovca da obavlja zvaničnu, izabranu ili imenovanu javnu dužnost, da se kandidira na izborima ili obavlja dužnost unutar političke stranke.

Zabrana je također ukinuta i za Blaška Jevrića koji je smijenjen 7. septembra 2000. godine sa pozicije šefa Ureda Ministarstva za izbjeglice u Doboju. Gospodin Jevrić je smijenjen zbog flagrantnog kršenja imovinskih zakona Republike Srpske i Aneksa 7 Dejtonskog mirovnog sporazuma. Zabrana je ukinuta pod sljedećim uslovima: gospodin Jevrić neće biti kandidat na narednim izborima i neće mu biti dozvoljeno da obavlja bilo koju javnu dužnost u oblasti povratka izbjeglica. Uz poštivanje ova dva ograničenja, gospodinu Jevriću će biti dozvoljeno da obavlja javne dužnosti.

Smjenjivanje nekooperativnih dužnosnika sa javnih funkcija je bila (i još uvijek je) vanredna mjera koja je neophodna da bi se uklonile glavne političke i institucionalne prepreke ka provedbi mira. Ova strategija se pokazala djelotvornom.

Međutim, mir u BiH je sada zaživio do one mjere u kojoj je moguće razmotriti postepeno poništavanje nekih odluka o smjeni.

Proces koji je početkom marta najavio visoki predstavnik znači da se neke osobe koje više ne predstavljaju prepreku u provedbi mira, bilo zbog toga što su se same promijenile ili zbog toga što su se okolnosti promijenile (ili zbog oboje), mogu ponovo kandidirati za pozicije u javnom životu i doprinijeti razvoju Bosne i Hercegovine.

Ukidanje odluke o smjeni ne dovodi u pitanje validnost prvobitne odluke.

Ukoliko bude neophodno, visoki predstavnik neće oklijevati da smijeni ova dva dužnosnika illi druge osobe za koje se utvrdi da opstruiraju konsolidaciju mira u Bosni i Hercegovini.